

LA Royne Mere a gouverné sept ans l'Estat de la France pendant le bas aage du Roy, (la necessité des affaires a introduit ceste forme de gouvernement, encore qu'elle ne s'accorde pas au naturel François.) Toutes choses se sont passées en assez bon ordre durant le temps de sa Regence; Et cette monarchie est grandement tenuë à sa prudence & à sa bonté: Il est vray que ce sont des parties qui ont esté necessaires en vn temps, mais non pas en tout temps. Car il y a quelques manquemēs dont on peut accuser sa facilité. Tout ce que l'on peut dire si le Roy n'a pas esté bien serni: c'est qu'il y auoit faute d'un homme. L'esprit de la femme est subtil & inuentif, mais il n'est pas propre pour gouverner & conduire. Si le bon-heur de la France eust produict vn homme digne de cette charge, il eust esté difficile de le trouuer sans interest. D'en choisir vn qui ne fust releué par dessus les autres, personne ne luy eust obey; de le prendre d'autorité sans estre capable, c'estoit la ruyne de l'Estat.

g

Il a dōc esté necessaire pour fuyr tels inconueniens, que la Royne Mere ayt eu le gouvernement, non tant pour l'vtilité que l'on se pouuoit promettre de son administration, que pour le danger qui pouuoit arriuer s'il eust esté mis entre les mains d'un autre; La personne du Fils & la qualité de Roy ne pouuoient courir fortune de la vie, ny de l'Estat, entre les mains d'une Mere, & d'une Royne.

Le Roy l'a des-jà recogneu, & si Dieu nous faict la grace de luy voir atteindre les parfaictes experiences du gouvernement de son Estat (comme de iour en

jour il y en prend vn heureux & miraculeux accroissement,) Nous le verrons iuger de tout ce qui s'est passé pour le bien de son seruice, amender ce qui se trouuera d'imparfaict, & oster ce que l'abus & la necessité du temps peut auoir introduit: Telles exercitations fortifieront d'auantage son iugement que s'il eust trouué toutes choses à souhait. Il se loüera de cognoistre que la France manquoit d'un homme, & qu'il est cest homme, qui se rend luy mesme necessaire à ses affaires, qui auoient besoing de sa presence.

On accuse le gouuernement de la Royne Mere sur le mesnagement des finances: Les curieux disent, Où est cest espargne du Roy Henry le Grand? Que sont deuenus ces thresors extraits des substances de tout vn peuple, qui composoient vn corps d'esperance, dont l'ame & la vie faisoient vne partie de la puissance de cette Monarchie? Ils ne sont plus: C'estoit le bras du Roy qui deuoit enfoncer cet arc, & debander ce fort nerf en quelque bonne & grande occasion, non pas en faire ou permettre l'employ sans subiet & sans vtilité.

La condition des grands comme celle des petits, est subiecte à la censure, car la langue qui est sans respect ne pardonne à personne. Encore que le Roy soit content, il les faut payer de raison pour les faire taire.

Les Poëtes racontent que trois puissantes Déesses entrèrent en contention pour vne pôme d'or: La dispute n'estoit pas de peu, puisqu'il y alloit de leurs merites: Aussi le iugemēt fut trouué si difficile que les Dieux s'en voulurent abstenir, l'auguste Iunon, la chaste Minerue, & la douce Venus, s'exposèrent nuëment aux yeux d'un Berger ignorant, & subirent à sa senten-

ce: l'Allegorie explique que puis que le sens commun estoit le iuge, la volupté ne pouuoit perdre son proces.

Nous auons veu cette fable de nos iours: Trois partys se sont faicts en France: l'Estat, la Religion & l'Opinion. Il s'est agitee vne question de telle importance qu'une assemblée generale de tous les ordres ne l'a peu resoudre ny determiner. Cependant l'argent du Roy (qui est ceste pōme d'or) a esté vendiqué & par vn aduis commun adiugé à ceux de la nouuelle opinion qui ont plaidé leur cause.

Ie dy bien d'auantage: Cette opinion ne s'est pas contentee de presenter le collet à l'Espouse de Iesus Christ, & mettre en controuersé le droit de la vraye Mere en la presence de son fils aîné; Elle a debatue le prix de la course avec la Royauté: Comme vne autre Atalante sa vîstesse a esté surmontee avec ces pommes d'or, les plus auancez de son parti ont tiré les recōpenſes & pris argēt pluſtoſt pour se taire, que pour parler, on ne les en blasme pas, veu qu'ils ont seruy le Roy, & bien fait leurs affaires.

La raison d'Estat veut qu'ils soient maintenus & conseruez, vn chacun le desîre de la façon que nous sommes: Mais s'ils entrent en meſſiance de la bonne volonté du Roy, & desîrent ſa s'agrâdir: Nous pouuons croire que leur mauuaîſe volonté croîſtra touſiours avec ſa liberté.

La liberté de conſcience (qui est le frain des Ames est le ſubiect de leur opinion; Si Dieu est ſerui de la ſorte, quels reſpects humains ſe peuuent promettre les puiſſances ſuperieures? Ils ſont bon nombre de gens

A ij

de bien & fideles seruiteurs de Roy, mais c'est par consideration de leur interest, & qu'ils ont quelque chose à perdre. S'ils aiment la paix : cela procede de la bonté de leur naturel, car leur religion ne leur apprend pas cela.

Durant les premiers ans du Roy, combien de tours a fait leur Cercle, que d'assemblées d'Eglises en leurs villes d'ostages. Ils n'ont pas eu honte d'introduire l'estranger (sans permission) contre les loix du Royaume, & les maximes d'Estat, dont ils se disent si religieux observateurs.

Ils ont formé des Republicques, & des gouvernemens populaires dans l'Estat de la Monarchie, qui à peine recognoissent le nom de la puissance du souverain.

Ils ont demandé le droit spirituel de l'Eglise en divers lieux, pour l'entretienement de leur Ministere.

Ont rasché d'obtenir vne Cité en chasque prouince, & deux Magistrats en chasque compagnie souveraine pour apprendre iusques aux secrets du Conseil.

Ont instamment poursuiuy vne charge du gouvernement general de leurs peuples, pour vne personne à leur mode, qui ne respondist de ses actions qu'à sa Majesté.

N'estoit-ce pas opposer vne volonté contraire à l'obeyssance qui se doit rendre au souverain? Donner vn cōpagnon au Roy? luy demander partage, & s'affranchir entierement de leur naturel debuoir?

A tout cela que pouuoit faire vne femme qui n'estoit pas assez forte pour faire la guerre, ny assez absoluë pour vniir les volontez diuiscées de ses subiects.

contre vn parti formé? La distribution des thresors du Roy ne fut-elle pas alors necessaire pour acheter la paix? les pensions de ceux que le mescontentement des grands auoit appelez pour former vn autre parti, ou les presens qui ont esté faicts à d'autres qui se sont contents en leur debuoir, se doibuent ils mettre sur le tapis? Tout cela reuiendrait à la honte cōmune, car ce ne sont pas les particuliers seulement qui ont de l'argent du Roy, les villes, les Prouinces, & les peuples mesmes y ont contribué.

Le seul poinct dont la Royne Mere ne s'excuse pas, & le seul de tous les manquemens qui peuuent estre en son administration (Le Roy de son propre mouvement l'a reparé:) Ce sont les grandes récompenses de la complaisante Galigay. Pour le vray elle luy auoit donné trop de puissance & trop bonne part en ses secrets & en ses conseils: car pour le mary c'estoit vne Idole iettée en fonte, sa vie & son mouvement n'alloient que par les ressorts de l'esprit de sa femme. La credulité de la Royne Mere n'eust iamais pensé que la fortune de cet homme se rendist suspecte, ny que rien de grand deust auoir place en sa pensée, elle s'imaginoit le deffaire aussi facilement qu'il auoit esté faict, mais elle s'est trompee: Aussi c'est vne des grandes merueilles que la France vit iamais. Vn estrangier incogneu, sans merite, sans autorité ny sans amis, destitué de courage, de iugement, & de conduite, a tout fait pour de l'argent: il s'est faict grand, est monté aux honneurs & a tiré beaucoup de galans hommes de son parti: a fait la guerre, asleuré ses affaires, & s'est mis en telle fortune que pour l'empescher d'aller plus

auant autre que le Roy n'y a peu mettre la main.

Monsieur le Prince & des plus grands de France, joignirent leur interest au cōmun ressentimēt de cete insolente fortune, mais ils ne peurent l'opprimer. Il eut des chefs puissants, des villes, & les peuples porterent l'autorité du Roy sur le front de leurs armes seulement pour le conseruer. Les armées furent prestes d'en venir aux mains, & se fust perduë la France par la France sans la prudence des chefs, qui par consideration n'ont iamais voulu donner bataille. Dieu qui ne fauorise pas le dessein des armes sans vne iuste occasion de guerre entreprit la vengeance de son Oingt: dont l'innocence estoit mal seruie de l'vn & l'autre parti: Toutes les deux armées passèrent soubs le pressoir de son ire, & la mort enleua plus d'hommes de la maladie, que n'a fait le fer des plus sanglantes batailles que nous ayons veu de nos iours.

Monsieur le Duc de Mayenne (genereux Prince) qui n'entēd pas raillerie, se mit le dernier aux champs, souffrit vn siege, & donna de belles preuues de sa valeur & de son courage, mais à la fin il eust eu du pire, sans le debris de cest enorme colosse: qui auoit couuert la France de son ombre, sur le Soleil couchant & sur le Soleil leuant.

Les ombres se retirent au montant du Soleil, ainsi cet esprit de tenebres disparut à la cholere du Roy: sa vie, sa fortune, & sa memoire, perirent en vn instant, il n'est rien demeuré de luy que le nom de ce qu'il fut autrefois.

Comme la nature ne souffre rien de vuide, vn cœur Royal ne peut viure sans amitié, le Roy a prins en af-

fection monsieur de Luynes dès son enfance, & la luy a si bien conseruee que c'est aujourd'huy la plus belle fortune d'homme qui viue.

Vne telle fortune ne se peut posseder sans enuie, c'est pourquoy chacun en discourt : les vns à cause de leur interest, les autres par opinion, & iusques aux indifferens, tout le monde en parle. Il a tiré deux de ses freres aupres de luy, qui le fortifient grandement, car ce sont trois pour vn : & encore pour rendre ce Gerion du tout inuincible, on luy a fait contracter l'alliance d'Hercule.

Toutesfois il est à craindre que ces trois fortunes ne deuiennent comme ces trois sœurs qui n'auoient qu'un œil, cest œil se perdit de la main à la main, comme elles le faisoient passer de l'une à l'autre. De mesme il est à craindre que la faueur du Roy (qui est vnique) ne leur eschappe par le chemin de tant de transmutations qu'ils luy font tenir, aussi crois-ie qu'ils y donnent bon ordre, puis qu'ils ne souffrent pas aisement que personne l'approche de trop pres.

Cette fortune n'est pas suspecte, puis qu'elle a sa consistance en la seule volonté du Roy. S'ils auoient de mauuais desseings, ils se seroient rendus puissants pour se maintenir, au contraire pour monstrier que leur intention est bonne, ils viuent sans obliger personne, ny sans faire vn amy.

Sa Majesté s'en trouue bien, & pour faire qu'elle soit vtilement seruie, ils contiennent aupres de sa personne, les mesmes Officiers & Ministres qui estoient du viutā du feu Roy: Mais le Roy n'a pas encore acquis les experiences de son Pere, qui estoit la meilleure teste de tout son Conseil.

Veritablement le Roy a des sages & sçauants hommes, capables de remettre le droit Romain, & toutes les coustumes locales de France si les loix estoient perduës: Mais cette science n'auiſe que la Iuſtice, qui n'eſt que le bras gauche de l'Eſtat. Il faut que l'eſpee & la force des armes ſoient en la droite main du Roy, & que les bons Capitaines ſoient appelez aux conſeils de guerre & de paix: comme la guerre ne ſe peut faire ſans eux, la paix ne ſe doit pareillement conclurre ſans les y appeller, veu qu'ils ſont les vrayſ iuges du temps & des occasions, de leuer ou mettre à bas les armes: & peuuent cognoiſtre ſi vne guerre eſt iuſte, ou vne paix honteuſe.

Il y a des hommes d'eſpee de bon eſprit, & qui iugent naturellement ſur vne vraye & ſolide raiſon, ſans ſ'empescher de cette ſcience morte, que les gens de lettres tirent de leurs liures avec plus de ſubtilité que d'edification. Vn homme droit & entier, n'a meilleur liure que ſon entendement, ny meilleur autheur que l'experience des affaires de ſa profeſſion, au moule de laquelle il fait des iugemens fort approchans de prophetie. Je ne parle pas des apprentis (car on n'employe pas que des gens bien-faiçts, & conſommez aux affaires) mais de ceux qui ont bonne teſte, deſquels on ſe doit ſeruir pour deux raiſons, l'vne pour le bien & l'vtilité que l'on tire de leur ſervice, l'autre pour le mal qu'ils peuuent faire ſ'ils ne ſont employez: parce qu'un bon eſprit n'eſt iamais oiſif, & vn deſpit de ſe voir meſpriſé eſt capable de luy faire faire du mal quand il n'en auroit pas la volonté,

Je ne feray point de Jugement de la conscience, ny du merite de Monsieur le Duc D'espernon, s'il prend le mescontentement ou si l'on le luy donne, eu esgard au temps: on pourroit dire beaucoup de choses: mais il suffira de quelques observations que j'ay faictes sur son sujet, lesquelles sont bonnes a dire, encores quelles ne soient communes puis quelles sont veritables.

Pour parler de sa fortuné elle est sans exemple. Il la faicte, & la conseruee (contre de puissants ennemys) durant le Regne de trois grands Roys, iusques a maintenant qu'il semble qu'il ce soit oublié, toutesfois la bonne opinion que l'on a de luy ayde grandement, estant difficile a croire qu'en l'aage où il est il veuille perdre la fortune de ses enfans.

Cet homme s'est aquis de grands secrets en la conduite des affaires, il a l'entregent d'entretenir beaucoup de monde en opinion de sa suffisance, & se communique a peu: le m'estonne comme il peut auoir tant d'amys? Veut que sa maniere d'obliger ne gaigne nullement le cœur des personnes, il est altier & rare en la distribution de ses faueurs, plus de gens le recherchent, qu'il n'en y a qui le possèdent, ceux de la recherche sont sans esperance, & ceux de la possession sans contentement: qui s'engage a luy entre en seruitude: quiconque est a luy perd plustost sa liberté, qu'il ne gaigne son amitié, s'il fait du bien a quelqu'un, il le luy fait tellement sentir, que cela mesme l'en desgoute: s'il veut du mal, il est Irreconciliable? Il ne se cognoist ny a l'humilité, ny au pardon, tout cela sont de conditions d'un homme qui fait estat de viure sans auoir besoin de personne, & de se passer de tout le Monde, neantmoins il est tellement fuiuy (en bonne ou mauuaise fortune) que s'il se fait un parry ou le Roy ne soit pas interressé difficilement pourra l'on trouuer en France un homme si puissant d'amys que luy.

Il en a de toutes sortes grands, & petits, mais ceux qu'il

appelle en son amitié sont ordinairement gens bien faits & propres à quelque chose, il vze des différences de leur condition par discretion : afin que l'enuie ne regne entre ceux qui sont à luy, & quoy qu'il en soit il n'a point de petits amys : car tous luy sont en consideration. Sans perdre rié de sa grauité il préd vne peine incroyable à les cōseruer si sa peine ne paroist pas : il visite souuent ses amys par lettres, & tout de sa main : ses secretaires ne sçauent pas la pluspart de ses affaires, il communique les secrets avec autant de retention & de mesure, qu'il recognoist de capacité : on se peut promettre du seruice de celuy qui les entend : car il garde tousiours le meilleur, & ne dit iamais le fonds de sa pensee. Deux personnes qui seront participants du secret d'une chose, ne feront iamais vn mesme iugement de son intention, d'autant qu'il la propose diuersement, neantmoins toutes ses diuersités respōdent à son sens, vne pluralité d'avis ne luy empesche iamais vne resolution, ou vne pensee passée en la determination de sa volonté. Ceste industrieuse façon de faire est si tenante quelle garde tout, ses amys sont tellement charmés qu'ils souffriront plustost d'estre blasmés de luy que loués d'un autre, tant ils font estime de son iugement.

Il a bien d'auantage. Il fait toutes choses sans mener grand bruiet, s'il a querelle où qu'il soit question de se rendre puissant contre quelque dangereux ennemy, soit pour le surprendre, où pour s'empescher d'estre surpris, ses preparatifs se font de son cabinet en hors.

Communemēt les querelles des grands amenant beaucoup de Rumeur, ils menacent de loin pour estonner l'ennemy, prenoit du temps pour se fortifier de leurs amys, & gagner les indifferents qui s'engagent au premier qui les employe : luy tout au contraire. Il a l'estat de ses amis en sa main, vne feuille de papier luy monstre sa puissâce quand l'occasion de les employer se presente. Il les auer-

tit à temps, & à point, ceux qui sont mandés sont prests à ce qu'il desire, & scauent où ils doibuent aller, chacun fait estat à part de ses amys particuliers, pour le seruir, au meilleurequipage qu'il peut, & tels apres sont faciles prompts & secrets, estant difficile que personne s'en donne de garde. Si bien qu'en vne bonne affaire que l'on croira mal accompagne, il est plustost prest à faire vn corps d'armee toute ordonnee, qu'une autre ne fera vne assemblee confuse d'amys. Et le bon est que tout cela ne luy couste guere, ne luy reuient à incommodité.

Vn homme qui a de grands desseings, & qui s'employe en beaucoup d'affaires avec vn tel soing, ne s'endort pas facilement: la nuit le couure souuent sans qu'il despouille sa robe d'estude pour vaquer a ses expéditions, la cause pour laquelle la France est sterile en hommes de grand espris, c'est la mollesse les Gentils hommes aux disciplines, & bonnes habitudes de l'ame, ils trauaillent assez leurs corps par des exercices violents: Mais cela ne fait que les endurcir au travail comme les autres animaux, dont il arriue deux inconueniens qui les perdent, ou les rendent du tout inutiles, l'un procede de la peine qu'ils se donnent sans discretion, l'autre du plaisir qu'ils prennent sans mesure, estant impossible que telles natures sensueles, destituées de l'usage des vertus morales, puissent viure autrement. Au contraires ceux qui gouvernent l'homme exterieur, par l'homme interieur, donnent vn perpetuel mouuement à l'esprit & cét vne maxime certaine que quād vn esprit reiglé & biē fait tient vne ame en action, iamais cest ame ne vient à gagner inutilement le terme de son repos, & s'il est question de faire iugement de quelque chose d'importance, elle s'arestetousiours sur la plus digne consideration.

L'homme duquel ie parle a beaucoup de bonnes parties, nous luy en auons veu pratiquer l'usage en bonne, & mauuaise fortune du temps du feu Roy, il auoit trou-

né son Maistre, c'est pourquoy il viuoit sanss'empescher de beaucoup d'affaires trouuillant seulement pour sa conseruation.

Depuis il s'est rendu, necessaire à l'Estat, & s'est assez utilement employé, toutesfois les maux domestiques luy tiennent beaucoup de tort, & en partie c'est la premiere cause de son mal-heur.

Le Roy estant deuenue le Maistre, le Mareschal d'Anchre mis a bas, & toutes choses changees, il s'est tenu loin: iusques à ce qu'il à trouué le moyen de mesler son interest, avec celuy de la Reyne Mere: en des-faing de se vanger des fauoris du Roy, se maintenir & conseruer la fortune de ses enfans.

Pour y paruenir il s'est fortifié d'amis & d'intelligences, par tout a son accoustumee, & particulierement avec la Noblesse de Lymosin, dont il a le gouuernement, recherchant plustost l'amitié des gënrils-hommes que des Villes, a cause que le pays est desgarni de places fortes, & que pour y commander, il suffit d'estre Maistre de la Campagne.

Il ya quelque temps qu'il auoit mis le pied dans vne petite Ville entre le haut & le bas Lymosin, forte d'assiette, dont les auenues sont difficiles, la garde facile, & le passage necessaire, le lieu le plus propre du mode pour vne seure retraicte, & pour faire beaucoup de mal.

Vzerche est cette Ville (terre d'Eglise) dont les habitants sont riches, & se sont tousiours bien gardez, occasion de la forteresse naturelle du lieu qui est vne petite montagne entouree d'vne riuere, fors vne estroite auenuë qui le peut facilement retrancher.

Aux derniers mouuemens viuoit vn Abbe qui scauoit plus qu'il ne falloit pour vn homme de robbe, & n'en scauoit pas assez pour faire le Capitaine, encore qu'il fust homme de faction: Cest Abbé craignant de perdre ceste place en temps de guerre, desirât y maintenir son autho-

rité, & se vanger d'un party qui s'opposoit à ses desseins y appella Monsieur le Duc Despernon, & reçut vne garnison.

Son desseing luy réussit, mais non pas son intention car Monsieur Despernon qui ne souffre pas de petits compagnons, & qui commande par tout où il a du pouuoir. Mésprisa sa courtoisie, & logea d'abord la garnison dans l'Abbaye qui estoit vne Citadelle toute faicte sans autrement rien changer toutes choses demeurant comme auparavant, dont tous les deux partis de la ville furent bien aises, & n'y eust personne de mal content que l'Abbé.

Ce fut à luy de courir & de se venir plaindre au Roy, il emporta quelques lettres de cachet mais pour auoir eu la curiosité de les voir, plustost qu'elles fussent rendues, il fust logé avecques plusieurs bons liures dont la compagnie ne luy estoit guiere agreable, mais s'estoit pour trôper le temps attendant l'impetration de son benefice.

Finalement il eust sa liberté pour ne se sentir pas obligé, de laquelle il courust fortune de la vie en vne Eglise champestre que le Sieur de Courson le vint enleuer, il estoit desia troussé quand vn bon compagnon de Prestre qui se mesle d'autre chose que de son breuiare fust à la recouffe, & d'un coup de carrabine fit quicter la vie, l'Abbaye, & l'Abbé au Sieur de Courson.

Il fust dommage de la mort de ce gentilhomme, il estoit fort courageux, mais s'estoit vn esprit tellement ambitieux qu'il ne pouuoit pas tenir dans sa peau: Il ne parloit iamais que de se mettre en reputation par quelque coup de la main, il en vouloit aux plus grands, & le plus souuent sans occasion, il marchoit en homme de querelle, & le trouuoit-on fort rarement à pied ou à cheual, (qui est extraordinaire) sans vne espee de combat.

La main qui luy donna la mort ne luy monstra pas le chemin de la vie eternelle, encore qu'il soit mort deuant le Prestre, il n'eust pas grand loisir de se souuenir de Dieu,

ses dernieres paroles furent dites à Monsieur Despernon non qu'il ait soing de mes enfans, & que ie suis mort pour son service.

L'Abbé fust assiegé, pour suiuy, & in dignement traité pour vne iuste cause en deffendant sa vie & son bien: Mais parce qu'il viuoit mal, il n'eschappa pas la vengeance diuine, il mourust à Rheims fort miserablement, & comme il appartenoit à vn homme qui venoit de rechercher des nouueaux moyens pour venger ses passions plustost que de se recognoistre,

Cette garnison estant demeuree, ces iours passez vn vieux fou de Capitaine interessé dans le parti de l'Abbé (dont les amis vivent encores) pensant donner l'espuuante à la Ville avec son grand Chappeler se ietta dans l'Abbaye, & au lieu d'auancer quelque chose, il perdit l'affection que les habitans pouuoient auoir pour Monsieur Despernon, leur faisant naistre (à cause de la haine qu'ils luy portent) le desir de recouurer leur liberté.

Entre ceux qui ont intherest que ceste ville soit libre, Monsieur de Pompadour, est le principal: comme leur proche voisin & bon amy: ayant ses maisons, & ses terres trop proches de là: pour souffrir vne garnison il leur offre son assistance à double intention, l'vne si la garnison estoit continuee contre la volonté du Roy, il auoit iuste subject de l'empescher, pour le service de sa Majesté, l'autre si c'estoit pour vne querelle particuliere, il auoit raison de si opposer pour son intherest.

Ce personnage à des ja bien commencé, il a de tresbelles parties en luy & dignes d'vne bonne fortune. s'il y vouloit mettre peine: il est d'vne grâde & ancienne maison, Quand à sa personne il vit sagement, par le peu, & de bon iugement, mesprise beaucoup de choses dont les autres font estat: se nourrist à la peine, & aux exercices violents: se cognoist aux gens desprit & les ayme: il a le courage grand, & la volonté bonne, grandement libe-

ral, fidelle & entier à ce qu'il ayme, il gaigne tellement le cœur de la Noblesse, qu'il y a peu de Gentils-hommes qui ne montent à cheual pour luy, pour vn homme, qui n'apoint de charge, il fera tousiours vn parry dans son pays, & n'en y a point qui se puissent vanter d'auoir tant d'amys que luy.

En ceste occasion il a assemblé deux cens Gentils hommes contre Monsieur d'Espernon (qui tient le cœur de toute ceste Prouince) qui n'est pas peu de chose : Monsieur Deschombery qui en est Lieutenant du Roy y a fait des troupes mais tout habile homme qu'il est il se fut trouué surpris & en gagé à de grandes extremités : car les habitants qui s'estoient retranchez n'estoient pas assez forts pour prendre l'Abbaye, n'y luy mesme assez puissant pour empescher le passage à Monsieur d'Espernon, logé à deux lieuës près avec deux mil hommes de pied, & cinq cens cheuaux pour aller au secours, il auoit bien plusieurs commissions de sa Majesté pour leuer des gens de guerre, mais tout estoit dans son coffre, & fort inutile en telle occasiō s'il a fait quelque chose de bon ce n'a esté que simplement sous vne assemblee d'amys les habitants ont eu de l'honneur en leur fait, & le Prestre qui auoit deliuré l'Abbè. Car ce fust celuy là mesme qui gagna l'Abbaye, & indiqua tous les endroits par ou il la falloit prendre cest exploit s'est faict avec grand bruit, & peu d'effect Monsieur d'Espernon s'est retiré dans Angoulesme sans combat, & les habitans d'Uzerche ont recouuert la liberté sans effusion de sang.

*Ceux qu'un espoir de guerre à tenus en attente
Approcheront en fin de mes iustes souhaits
Que le Roy soit le Maistre & la Reyne contente,
Tout l'intherest des grands n'empeschera la paix.*

